

摛藻堂四庫全書薈要

集部

欽定四庫全書叢要

集部

漢魏六朝百三家集卷三十四

詳校官候選知縣臣吳甸華



欽定四庫全書
漢書要卷一萬九千六百二十三集部

漢魏六朝百三家集卷三十四

明 張溥 輯



東平賦

夫九州有方圓九野有形勢區域高下物有其制開之則通塞之則否流之則行壅之則止崇之則成丘陵汙

之則為數澤逶迤漫衍繞以大壑及至分之國邑樹之
表物四時儀其象陰陽暢其氣傍通迴盪有形有德雲
升雷動一叫一默或由之安乃用斯惑若觀夫隅隈之
缺幽荒之塗沕漠之域窮野之都竒偉譎詭可以勝圖
乃有徧遊之士浩養之雅凌驚風躡浮霄清濁俱逝吉
凶相招是以伶倫遊鳳於崑崙之陽鄒子喻溫於黍谷
之陰伯高登降於尚季之上羨門逍遙於三山之岑上
遨玄圃下遊鄧林鳳鳥自歌翔鸞自舞嘉穀蕃殖匪我

稷黍其阨陋則有橫術之場鹿豕之墟匪修潔之攸麗
於穢累之所如西則首仰阿甄傍通戚浦桑間濮上淫
荒所廬三晉縱橫鄭衛紛敷豪俊凌屬徒屬留居是以
強禦橫於戶牖怨毒奮於牀隅仍渺欲而作慝豈待久
而發諸厥土惟中劉王是聚高危臨城窮川帶宇叔氏婚
族實在其渭背險向水垢汙多私是以其州閭鄙邑莫
言或非殞情戾慮以殖厥資其土田則原壤蕪荒樹藝
失時疇畝不辟荆棘不治流潢餘塘洋洋靡之東當三

齊西接鄒魯長塗千里受茲商旅力間為率師使以輔
驕僕纖邑於焉斯處川澤捷徑洞庭荆楚遺風過焉是
徑是宇由而紹俗靡則靡觀非夷罔式導斯作殘是以
其唱和矜勢背理向姦尚氣逐利因畏惟愆其居處壅
翳蔽塞寃邃弗章倚以陵墓帶以曲房是故居之則心
昏言之則志哀悖罔徒易靡所寤懷其外有濁河萦其
塘清濟盪其樊其北有連岡施靡崎嶇山陵崔巍雲電
相干長風振厲蕭條太原其南則浮汶湛湛行潦成池

深林茂樹翁鬱參差羣鳥翔天百獸交馳雖默首之
不淑兮儻山澤之足彌古哲人之攸貴兮好政教之有
儀彼玄真之所寶兮樂寂寞之無知咨問闇之散感
兮因回風以揚聲瞻荒榛之蕪穢兮顧東山之葱青
甘丘里之舊言兮發新詩以慰情信嚴霜之未滋兮
豈丹木之再榮北門悲於殷憂兮小弁哀於獨誠鷗
端一而慕仁兮何淳朴之靡逞彼羽儀之惑志兮矧
伊人之匪靈時懶惄以遙思兮飈飄颻以欲歸欵丕

遊於陵顛兮舉斯羣而競飛物修化而神樂兮寧遐
觀之可追乘松舟以載險兮雖無維而自繫騁驛騶
於狹路兮顧蹇驢而弗及資章甫以遊越兮見犀光
而先入被文繡而賈戎兮識旃裘之必襲奉淳德之
平和兮孰斯邦之可集將言歸於美俗兮請王子與
俱遊漱玉液之滋怡兮飲白水之清流遂虛心而後已
兮又何懷乎患憂重曰嘉年時之淑清兮美春陽以肇
夏託思飈而載行兮因形骸以成駕遵間維而長

驅兮問迷罔於莞風玄雲興而四周兮寒雨淪而下降
忽一寤而喪軌兮蹈空虛而遂征扶搖蔽於合墟兮
咸池照乎增城欣煌煌之朝顯兮喜太陽之炎精測
虛舟以遑思兮聊逍遙於清溟謹玄真之諱訓兮想
至人之有形繡靡覩其紛錯兮慮彌遠而度逼茲旋
輶於昧澮兮若空桑之可即言淫衍而莫止兮心綿
綿而未息集舒誥以鑒戒兮賜衆誨之難測神遙遙
以抒歸兮畏雙環之在側咨禽鳥之不羣兮悼悠悠

之無極感藜藿之易修兮攝左右之相譽懼從風而
永去兮託願頃於鮒隅雖琴瑟之畢存兮豈聲曲之
復舒慮遨遊以觀奇兮彼上騰其馬如紛晦曖以亂
錯兮漫浩瀼而未靜理都繆而改據兮竦端委而自整
制規矩以儀衡兮占我龜以觀省眺茲輿之所徹兮寔
斯近而匪遠豈三年之無問兮將一往而九反顧果日
之初開兮馳曲陵而飾容時零落之飄颻兮試枯莞之
必從釋遼遙之間度兮習約結之常契巡襄城之間

收兮誦純一之遺誓被風雨之沾濡兮安敢軒翥而
遊署竊悄悄之眷貞兮泰恬淡而永世豈淹留以為
感兮將易貌乎殊方乃擇高以登棲兮永欣欣而樂
康

元父賦

吾嘗遊元父登其城使人愁思作賦以記之言不足樂
也

元父者九州之窮地先代之幽墟者也故其城郭卑小

局促危隘不遐其土田則汙除漸淤泥溼槃洿方池邊屬兮容水滂沱穢菜惟產兮不食實多地下沉陰兮受氣匪和太陽不周兮植物靡嘉故其人民頑嚚檮杌下愚難化其區域壅絕斷塞分迫旋淵終始同貫本末相牽疇昔訖今曠世歷年鉅野瀦其後窮濟盡其前畊澗不暢垢濁寔臻不肖羣聚屋空無賢故其民放散肴亂藪竄澤居比跡麋鹿齊志豪羆是以其原壤不辟樹藝希疏覓葦彌臯蚊虫慘膚也於其遠險則右金鄉而左

高平崇陵崔巍深溪崕嶧美類不處熊虎是生故人民
被害嚼齒禽性獸情爾之近阻則鳴鳩麽其前曲城發
其後鷗梟羣翔狐狸萬口故其人民狼風豺氣盪電無
厚南望春申東瞻孟嘗袁界薛邑境邊山陽逆旅行舍
姦盜所藏北臨平陸齊之西封捷徑燕趙逃遯逍遙故
其人民側匿頗僻隱蔽不公懷私抱詐爽慝是從禮義
不設淳化匪同先哲遺言有昭有聾如何君子棲遲斯
邦

首陽山賦

正元元年秋余尚為中郎在大將軍府獨往南牆下北首陽山賦曰

在茲年之末歲兮端旬首而重陰風飄回以曲至兮雨旋轉而纖襟蟋蟀鳴乎東房兮鶗鴂號乎西林時將暮而無儔兮慮悽愴而感心振沙衣而出門兮纓委絕而靡尋步徒倚以遙思兮喟歎息而微吟將修飾而欲往兮衆鹹鹹而笑人靜寂寞而獨立兮亮孤植而靡因懷

分索之情一兮穢羣偽之射真信可實而弗離兮寧高
舉而自賓聊仰首以廣頰兮瞻首陽之岡岑樹叢茂以
傾倚兮紛蕭爽而揚音下崎嶇而無薄兮上洞徹而無
依鳳翔過而不集兮鳴梟羣而竝棲颺遙逝而遠去兮
二老窮而來歸寔囚軋而處斯兮焉暇豫而敢誹嘉栗
屏而不存兮故甘死而採薇彼背殷而從昌兮投危敗
而弗遲此進而不合兮又何稱乎仁義肆壽天而弗豫
兮競毀譽以為度察前載之是云兮何美論之足慕苟

道求之在細兮焉子誕而多辭且清虛以守神兮豈慷慨而言之

清思賦

余以為形之可見非色之美音之可聞非聲之善昔黃帝登僊於荆山之上振咸池於南嶽之岡鬼神其幽而夔牙不聞其章女娃耀榮於東海之濱而翩翻於洪西之旁林石之隕從而瑤臺不照其光是以微妙無形寂寞無聽然後乃可以覩窈窕而淑清故白日麗光則季

后不步其容鐘鼓闇鎔則延子不揚其聲夫清虛寥廓
則神物來集飄颻恍忽則洞幽貫冥冰心玉質則皦潔
思存恬澹無慾則泰志適情伊衷慮之道好兮又焉處
而靡逞寒風邁於黍穀兮誨子而遊鵠申孺悲而母歸
兮吳鴻哀而象生茲感激以達神豈浩養而弗營志不
覬而神正心不蕩而自誠固秉一而內脩堪尊止之匪
傾惟清朝而夕晏兮指濛汜以永寧是時羲和既頽玄
夜始局望舒整轡素風來征輕帷連颺華裯肅清彭蚌

微吟螻蛄徐鳴望南山之崔巍兮顧北林之葱菁太陰
潛乎後房兮明月耀乎前庭迺申展而缺寐兮忽一悟
而自驚焉長靈以遂寂兮將有歛乎所之意流盪而改
慮兮心震動而有思若有來而可接兮若有去而不辭
心恍忽而失度情散越而靡治豈覺察而明真兮誠雲
夢其如茲驚奇聲之異造兮鑑殊色之在斯開丹山之
琴瑟兮聆崇陵之參差始徐唱而微響兮情悄慧以螭
蛇遂招雲以致氣兮乃振動而大駭聲颺颺以洋洋若

登崑崙而臨西海超遙茫渺不能究其所在心瀆瀆而
無所終薄兮思悠悠而未半鄧林殪於大澤兮欽邳悲
於瑤嶧徘徊夷由兮猗靡廣衍遊平圃以長望兮乘脩
水之華旂長思肅以永至兮滌平衢之大夷循路曠以
徑通兮辟闔闢而洞闔羨要眇之飄遊兮倚東風以揚
暉沫洧淵以淑密兮體清潔而靡譏厭白玉以為面兮
披丹霞以為衣襲九英之曜精兮珮瑤光以發微服儻
煜以繽紛兮綺衆采以相綴色熠熠以流爛兮紛雜錯

以歲蕤象朝雲之一合兮似變化之相依麾常儀使先
好兮命河女以胥歸步容與而特進兮盼兩楹而升墀
振瑤谿而鳴玉兮播陵陽之斐斐蹈消淡之危跡兮躡
離散之輕微釋安朝之朱履兮踐席假而集帷敷斯來
之在室兮乃飄忽之所晞馨香發而外揚兮媚顏灼以
顯姿清言竊其如蘭兮辭婉婉而靡違託精靈之運會
兮浮日月之餘暉假淳氣之精微兮幸備嬿以自私願
申愛於今夕兮尚有訪乎是非被芬芳之夕暢兮將暫

往而永歸觀悅懌而未靜兮言未究而心悲嗟雲霓之
可憑兮翻揮翼而俱飛棄中堂之局促兮遺戶牖之不
處帷幕張而靡御兮几筵設而莫拊載雲輿之庵靄兮
乘夏后之兩龍折丹木以蔽陽兮竦芝蓋之三重翩翼
翼以左右兮紛悠悠以容容瞻朝霞之相承兮似美人
之懷憂采色雜以成文兮忽離散而不留若將言之未
發兮又氣變而飄浮若垂髦而失鬚兮飾未集而形消
目流盼而自別兮心欲來而貌遼紛綺靡而未盡兮先

列宿之規矩兮時儻莽而陰曠兮忽不識乎舊宇邁黃妖
之崇臺兮雷師奮而下雨內英哲與長年兮笞離倫與
膺賈摧魍魎而折鬼神兮直徑登乎所期歷四方而縱
懷兮誰云顧乎或疑超高躍而疾驚兮至北極而放之
援間維以相示兮臨寒門而長辭既不以萬物累心兮
豈一女子之足思

獮猴賦

昔禹平水土而使益驅禽滌蕩川谷兮櫛梳山林是以

神姿形於九鼎而異物來臻故豐狐文豹釋其表間尾
騶虞獻其珍夸父獨鹿祓其豪青馬三駟棄其羣此以
其壯而殘其生者也若夫熊羆之遊臨江兮見厥功以
乘危夔負淵以肆志兮揚震聲而衣皮處閒曠而或昭
兮何幽隱之罔隨魑畏逼以潛身兮穴神丘之重深終
或餌以求食兮烏鑿之而能禁誠有利而可欲兮雖希
覲而為禽故近者不稱歲遠者不歷年大則有稱於萬
年細者則為笑於目前夫獮猴直其微者也猶繫累於

下陳體多似而匪類形乖殊而不純外察慧而內無度
兮故人面而獸心性褊淺而干進兮似韓非之囚秦揚
眉額而驟呻兮似巧言而偽真藩從後之繁衆兮猶伐
樹而喪鄰整衣冠而偉服兮懷項王之思歸耽嗜慾而
盼視兮有長卿之妍姿舉頭吻而作態兮動可增而自
新沐蘭湯而滋穢兮匪宋朝之媚人終蚩弄而處泄兮
雖近習而不親多才伎其何為固受垢而貌侵姿便捷
而好技兮超超騰躍乎岑蟲既投林以東避兮遂中岡

而被尋嬰徽纏以拘制兮顧西山而長吟緣棖桷以容
與兮志豈忘乎鄧林庶君子之嘉惠設竒視以盡心且
須臾以永日焉逸豫而自矜斯伏死於堂下長滅沒乎
形神

鳩賦

嘉平中得兩鳩子常食以黍稷後卒為狗所殺故為作
賦

伊嘉年之茂惠洪肇恍忽以發蒙有期緣之奇鳥以鳴

鳩之攸同翔彫木以胎偶寄增巢於喬松噙雲霧以消息遊朝陽以相從曠踰旬而育類嘉七子之修容始戢翼而樹羽遭金風之蕭瑟既顛覆而靡救又振落而莫彌陵桓山以徘徊臨舊鄉而思入揚哀鳴以相送悲一往而不集終飄搖以流離傷弱子之悼栗何依恃以育養賴兄弟之親戚背草萊以求仁託君子之靜室甘黍稷之芳饍安戶牖之無疾潔文襟以交頸抗華麗之艷溢端妍姿以鑒飾好威儀之如一聊俛仰以逍遙求愛

媚於今日何飛翔之羨慕願殺報而忘畢值狂犬之暴怒加楚害於微軀欲殘沒以糜滅遂捐棄而淪失

牋

為鄭沖勸晉王牋

沖等死罪伏見嘉命顯至竊聞明公固讓冲等眷眷實有愚心以為聖王作制百代同風褒德賞功有自來矣昔伊尹有莘氏之媵臣耳一佐成湯遂荷阿衡之號周公藉已成之勢據既安之業光宅曲阜奄有龜蒙呂尚

磻磯之漁者耳一朝指麾乃封營丘自是以來功薄而賞厚者不可勝數然賢哲之士猶以為美談況今自先相國以來世有明德翼輔魏室以綏天下朝無闕政人無謗言前者明公西征靈州北臨沙漠榆中以西望風震服羌戎東馳迴首內向東誅叛逆全軍獨尅禽闔閭之將斬輕銳之卒以萬萬計威加南海名攝三越宇內康寧竒慝不作是以殊俗畏威東夷獻舞故聖上覽乃昔以來禮典舊章開國光宅顯茲太原明公宜承聖旨

受茲介福允當天人元功盛勲光光如彼國土嘉祚巍
巍如此內外協同靡侃讐靡違由斯征伐則可朝服濟江
掃除吳會西塞江源望祀岷山迴戈弭節以麾天下遠
無不服邇無不肅大魏之德光于唐虞明公盛勲超于
桓文然後臨滄洲而謝支伯登箕山以揖許由豈不盛
乎至公至平誰與為鄰何必勤勤小讓也哉沖等不通
大體敢以陳聞

奏記

辭蔣太尉辟命奏記

籍死罪死罪伏惟明公以含一之德據上台之位羣英翹首俊賢抗足開府之日人人自以為掾屬辟書始下走為首子夏處西河之上而文侯擁奪鄒子居黍谷之陰而昭王陪乘夫布衣窮居韋帶之士王公大人所以屈體而下之者為道存也籍無鄒卜之德而有其陋猥煩大禮何以當之方將耕於東臯之陽輸黍稷之稅以避當塗者之路負薪疲病足力不彊補吏之名非所

克堪乞迴謬恩以光清舉

又

違由鄙鈍學行固野進無和俗崇譽之高退無靜默恬
沖之操猥見顯飾非所被荷舊素厄療守病委劣謁拜
之命未敢堪任昔榮期帶索仲尼不易其三樂仲子守
志楚王不奪其灌園貪榮塞賢昧進負譏憂望文集五
情相愧明公侔蹤魯衛勲隆桓文廣延俊傑恢崇大業
乞降期會以避清路畢願家巷惟蒙於許

書

與晉王薦盧播書

蓋聞興化濟治在於得人收奇拔異聖賢高致是以八士歸周周道以隆虞舜登庸元凱咸事伏惟明公公侯皇靈誕秀九德光被應期作輔論道敷化開闢四門延納羽翼賢士以贊雍熙是以英俊之士願排皇闈策名委質真薦之徒輻輳大府誠以鄧林昆吾翔鳳所栖懸黎和肆垂棘所集伏見鄙州別駕同郡盧播年三十二

字景宣少有才秀之異長懷淑茂之量耽道悅禮仗義
依仁研精墳典升堂覩奧聰鑒物理闕通玄妙貞固足
以幹事忠敬足以肅朝明斷足以質疑機密足以應權
臨煩不惑在急彌明若得佐時理物則政事之器銜命
聘享則專對之才潛心圖籍文學之宗敷藻載述良史
之表然而學不為人行不求達故久沉淪未階太清誠
後門之秀偉當時之利器宜蒙旌命和味鼎鉉孔子曰
如有所譽必有所試播之所能著在己効不敢虛飾取

訪大府

答伏羲書

籍白承音覽旨有心翰跡夫九蒼之高迅羽不能尋其
巔四溟之深幽鱗不能測其底矧無毛分所能論哉且
玄雲無定體應龍不常儀或朝濟夕倦翕忽代興或泥
潛天飛晨降宵升舒體則八維不足暢迹促節則無間
足以從容是又瞽夫所不能瞻璞蟲所不能解也然則
弘修淵邈者非近力所能究矣靈變神化者非局器所

能察矣何吾子之區區而吾真之務求乎人力勢不能
齊好尚舛異鸞鳳凌雲漢以舞翼鳩鶴悅蓬林以翹翔
螭浮八濱以濯鱗鼈娛行潦而羣逝斯用情各從其好
以取樂焉據此非彼胡可齊乎夫人之立節也將舒網
以籠世豈樽樽以入罔方開模以範俗何暇毀質以適
檢若良運未協神機無准則騰精抗志邈世高超蕩精
舉於玄區之表據妙節於九垓之外而翱翔之乘景躍
踐踔陵忽恍從容與道化同逍遙與日月並流交名

虛以齊變及英祇以等化上乎無上下乎無下居乎無室出乎無門齊萬物之去留隨六氣之虛盈總玄綱於太極撫天一於寥廓飄埃不能揚其波飛塵不能垢其潔徒寄形軀於斯域何精神之可察雖業無不聞略無不稱而明有所逮未可怪也觀吾子之趨欲銜傾城之金求百錢之售制造天之禮凝膚寸之檢勞玉躬以役物守臊穢以自畢沈牛跡之浥薄慍河漢之無根其陋可愧其事可悲亮規略之懸踰信大道之弘幽且局步

於常衢無為思遠以自愁比連瘳憤力喻不多阮籍白

論

樂論

劉子問曰孔子云安上治民莫善於禮移風易俗莫善於樂夫禮者男女之所以別父子之所以成君臣之所以立百姓之所以平也為政之具靡先於此故安上治民莫善於禮也夫金石絲竹鐘鼓管絃之音干戚羽旄進退俯仰之容有之何益於政無之何損於化而曰移

風易俗莫善於樂乎阮先生曰善哉子之間也昔者孔子著其都乎且未舉其略也今將為子論其凡而子自備詳焉夫樂者天地之體萬物之性也合其體得其性則和離其體失其性則乖昔者聖人之作樂也將以順天地之體成萬物之性也故定天地八方之音以迎陰陽八風之聲均黃鐘中和之律開羣生萬物之情氣故律呂協則陰陽和音聲適而萬物類男女不易其所君臣不犯其位四海同其觀九州一其節奏之圜山而天

神下奏之方岳而地祇上天地合其德則萬物合其生
刑賞不用而民自安矣乾坤易簡故雅樂不煩道德平
淡故五聲無味不煩則陰陽自通無味則百物自樂日
遷善成化而不自知風俗移易而同於是樂此自然之
道樂之所始也其後聖人不作道德荒壞政法不立智
慧擾物化廢欲行各有風俗故造始之教謂之風習而
行之謂之俗楚越之風好勇故其俗輕死鄭衛之風好
淫故其俗輕蕩輕死故有火焰赴水之歌輕蕩故有桑

間濮上之典各歌其所好各詠其所為歌之者流涕聞
之者歎息背而去之無不慷慨懷永日之娛抱長夜之
歎相聚而合之羣而習之靡靡無已棄父子之親弛君
臣之制匱室家之禮廢耕農之業忘終身之樂崇淫縱
之俗故江淮之南其民好殘漳汝之間其民好奔吳有
雙劔之節趙有扶琴之客氣發於中聲入於耳手足飛
揚不覺其駭好勇則犯上淫放則棄親犯上則君臣逆
棄親則父子乖離逆交爭則患生禍起禍起而意愈異

患生而慮不同故八方殊風九州異俗乖離分背莫能
相通音異氣別曲節不齊故聖人立調適之音建平和
之聲制便事之節定順從之容使天下之為樂者莫不
儀焉自上以下降殺有等至於庶人咸皆聞之歌謠者
詠先王之德頬仰者習先王之容器具者象先王之式
度數者應先王之制入於心淪於氣心氣和洽則風俗
齊一聖人之為進退頬仰之容也將以屈形體服心意
便所修安所事也歌詠詩曲將以宣平和著不逮也鐘

鼓所以節耳羽旄所以制目聽之者不傾視之者不衰
耳目不傾不衰則風俗移易故移風易俗莫善於樂也
故八音有本體五聲有自然其同物者以大小相君有
自然故不可亂大小相君故可得而平也若夫空桑之
琴雲和之瑟孤竹之管泗濱之磬其物皆調和淳均者
聲相宜也故必有常處以大小相君應黃鐘之氣故必
有常數有常處故其器貴重有常數故其制不妄貴重
故可得以事神不妄故可得以化人其物係天地之象

故不可妄造其凡似遠物之音故不可妄易雅頌有分
故人神不雜節會有數故曲折不亂周旋有度故頫仰
不惑歌詠有主故言語不悖尊之以善綏之以和守之
以衷持之以久散其羣比其文扶其天助其壽使去風
俗之偏習歸聖王之大化先王之為樂也將以定萬物
之情一天下之意也故使其聲平其容和下不思上之
聲君不欲臣之色上下不爭而忠義成夫正樂者所以
屏淫聲也故樂廢則淫聲作漢哀帝不好音罷省樂府

而不知制正禮樂法不修淫聲遂起張放淳于長驕縱
過度丙彊景武富溢於世罷樂之後下移踰肆身不是
好而淫亂愈甚者禮不設也刑教一體禮樂外內也刑
弛則教不獨行禮廢則樂無所立尊卑有分上下有等
謂之禮人安其生情意無哀謂之樂車服旌旗宮室飲
食禮之具也鐘磬鞞鼓琴瑟歌舞樂之器也禮踰其制
則尊卑乖樂失其序則親疎亂禮定其象樂平其心禮
治其外樂化其內禮樂正而天下平昔衛人求繁縟曲

縣而孔子歎息蓋惜禮壞而樂崩也夫鐘者聲之主也
縣者鐘之制也鐘失其制則聲失其主主制無常則怪
聲竝出盛衰之代相及古今之變若一故聖教廢毀則
聰慧之人竝造奇音景王喜大鐘之律平公好師延之
曲公卿大夫拊手嗟歎庶人羣生踊躍思聞正樂遂廢
鄭聲大興雅頌之詩不講而妖淫之曲是尋延年造傾
城之歌而孝武思靡曼之色雍門作松栢之音愍王念
未寒之服故猗靡哀思之音發愁怨偷薄之辭興則人

後有縱欲奢侈之意人後有內顧自奉之心是以君子惡大凌之歌憎北里之舞也昔先王制樂非以縱耳目之觀崇曲房之嬿也必通天地之氣靜萬物之神也固上下之位定性命之真也故清廟之歌詠成功之績賓饗之詩稱禮讓之則百姓化其善異俗服其德此淫聲之所以薄正樂之所以貴也然禮與變俱樂與時化故五帝不同制三王各異造非其相反應時變也夫百姓安服淫亂之聲殘壞先王之正故後王必更作樂各宣

其功德於天下通其變使民不倦然但改其名目變造
歌詠至於樂聲平和自若故黃帝詠雲門之神少昊歌
鳳鳥之跡咸池六英之名既變而黃鐘之宮不改易故
達道之化者可與審樂好音之聲者不足與論律也舜
命夔龍典樂教胄子以中和之德也詩言志歌詠言聲
依詠律和聲八音克諧無相奪倫神人以和又曰予欲
聞六律五聲八音在治習以出納五言女聽夫煩手淫
聲汨涇心耳乃忘平和君子弗聽言正樂通平易簡心

澄氣清以聞音律出納五言也夔曰戛擊鳴球搏拊琴瑟以詠祖考來格虞賓在位羣后德讓下管鼗鼓合止祝敔笙鏞以間鳥獸蹠蹠籥韶九成鳳凰來儀夔曰於予擊石拊石百獸率舞庶尹允諧詩言志歌詠言操磬鳴琴以聲依律述先王之德故祖考之神來格也笙鏞以間正樂聲希治修無害故繁毓蹠蹠然也樂有節適九成而已陰陽調達和氣均通故遠鳥來儀也質而不文四海合同故擊石拊石百獸率舞也言天下治平萬

物得所音聲不譁漠然未兆故衆官皆和也故孔子在齊聞韶三月不知肉味言至樂使人無欲心平氣定不以肉為滋味也以此觀之知聖人之樂和而已矣自西陸青陽之樂皆取之竹聽鳳凰之鳴尊長風之象采大林之闕當時之所不見百姓之所希聞故天下懷其德而化其神也夫雅樂周通則萬物和質靜則聽不淫易簡則節制全神靜重則服人心此先王造樂之意也自後衰末之為樂也其物不真其器不固其制不信取於

近物同於人間各求其好恣意所存閭里之聲競高永
巷之音爭先童兒相聚以詠富貴芻牧負戴以歌賤貧
君臣之職未廢而一人懷萬心也當夏后之末與女萬
人衣以文繡食以梁肉端噪晨歌聞之者憂戚天下苦
其殃百姓傷其毒殷之季君亦奏斯樂酒池肉林夜以
繼日然咨嗟之音未絕而敵國已收其琴瑟矣滿堂而
飲酒樂奏而流涕此非皆有憂者也則此樂非樂也當
王居臣之時奏新樂於廟中聞之者皆為之悲咽桓帝

聞楚琴悽愴傷心倚房而悲慷慨長息曰善哉乎為琴
若此一而已足矣順帝上恭陵過樊衢聞鳥鳴而悲泣
下橫流曰善哉鳥聲使左右吟之曰使絲聲若是豈不
樂哉夫是謂以悲為樂者也誠以悲為樂則天下何樂
之有天下無樂而有陰陽調和灾害不生亦已難矣樂
者使人精神平和衰氣不入天地交泰遠物來集故謂
之樂也今則流涕感動噓唏傷氣寒暑不適庶物不遂
雖出絲竹宜謂之哀奈何俛仰歎息以此稱樂乎昔季

流子向風而琴聽之者泣下沾襟弟子曰善哉鼓琴亦已妙矣季流子曰樂謂之善哀謂之傷吾謂哀傷非為善樂也以此言之絲竹不必為樂歌詠不必為善也故墨子之非樂也悲夫以哀為樂者胡亥耽哀不變故願為黔首李斯隨哀不返故思逐狡兔嗚呼君子可不鑒之哉

通易論

阮子曰易者何也乃昔之玄真往古之變經也庖犧氏

當天地一終值人物憔悴利用不存法制夷昧神明之德不通萬物之情不類於是始作八卦引而伸之觸類而長之分陰陽序剛柔積山澤連水火雜而一之變而通之終於未濟六十四卦盡而不窮是以天地象而萬物形吉凶著而悔吝生事用有取變化有成南面聽斷向明而治結繩而為網罟致日中之貨修耒耜之利以教天下皆得其所黃帝堯舜應時當務各有攸取窮神知化述則天序庖犧氏布演六十四卦之變後世聖人

觀而因之象而用之禹湯之經皆在而上古之文不存至乎文王故係其辭於是歸藏氏逝而周典經興上下無常剛柔相易不可為典要惟變所適故謂之易易之為書也本天地因陰陽推盛衰出自幽微以致明著故乾元初潛龍勿用言大人之德隱而未彰潛而未達待時而興循變而發天地既設屯蒙始生需以待時訟以立義師以聚衆比以安民是以先王以建萬國親諸侯收其心也原而積之畜而制之是以上下和洽裁成天

地之道輔相天地之宜以左右民順其理也先王既沒德法乖易上凌下替君臣不制剛柔不和天地不交是以君子一類求同遏惡揚善以致其大謙而光之裒多益寡崇聖善以命雷出於地於是大人得位明聖又興故先王作樂薦上帝昭明其道以答天貺於是萬物服從隨而事之子遵其父臣承其君臨馭統一大觀天下是以先王以省方觀民設教儀之以度也包而有之合而含之故先王用之以明罰勅法自上乃下貴復其賤

美成亨盡時極日至先王閉關商旅不行后不省方以
靜民也季葉既衰非謀之獲應運順天不妄其作故先
王茂對時育萬物施仁布澤以樹其德也萬物歸隨如
法流承養善反惡利積生害剛過失柄習坎以位上失
其道下喪其羣於是大人繼明照于四方顯其德也自
乾元以來施平而明盛衰有時剛柔無常或得或失一
陰一陽出入吉凶由閭察彰文明以止有翼不飛隨之
乃存取之者歸施之以若用之在微貴變慎小與物相

追非知來藏往者莫之能審也易之為書也覆燾天地
之道囊括萬物之情道至而反事極而改反用應時改
用當務應時故天下仰其澤當務故萬物恃其利澤施
而天下服此天下之所以順自然惠生類也富貴侔天
地功名充六合莫之能傾莫之能害者道不逆也天地
易之主也萬物易之心也故虛以受之感以和之男下
女上通其氣也柔以承剛久其類也順而持之遁而退
之上隆下積剛動大壯正大必用力盛則望明升惟進

光大則傷聚以處身異以成類乖離既解緩以為失損
益有時察以主使揚于王庭乘五馬敗剛既決柔上索
下合令臣遭明君以柔遇剛品物咸亨剛據中正天下
大行是以后用施命誥四國貴離教也於是天地萃聚
百姓合同升而已届極及下井養不窮卑不能通不可
弗革改以成器尊卑有分長幼有序主之以震守之
以威動不可終敵應而行漸以進之為人求位君子之
欲進者也臣之求君陰之從陽委之歸誠乃得其所歸

而應之專而一之陽德受歸道豐位大也賢人君子有
衆以成其大也窮侈喪大夫之位羣而靡容容而無所
卑身下意利見大人巽以申命柔順乎剛入而說之說
而教之順天應人渙然成章風行水上有文有光男行
不窮女位乎外衆陰承五上同在中從初更始乘木有
功故先王以享于帝立廟奉天建國也剛柔分適得中
節之以制其道不窮信愛結內剛得中位誠發於心庶
物唯類大得則虧甚往則過既應於遠默則不利故君

子是以行重乎恭喪重乎哀篤僞薄也小過下泰不宜
於上下止上動有飛鳥之象焉初六坎下上六離體飛
鳥以凶是以災眚也柔處中剛失位利與時行過而欲
遂小亨正象陰皆乘陽陽剛凌替君臣易位亂而不已
非中之謂故君子思患而豫防之慮其敗也通變無窮
周敗又始剛未出陰在中柔濟不遺遂度不窮則象河
洛神物設教而天下服慎辨居方陰陽相求初與之道
遠作之由也卦體開闔乾以一為開坤以二為闔乾坤

成體而剛柔有位故木老於未水生於申而坤在西南
火老於戌木生於亥而乾在西北剛柔之際也故謂之
父母陽承震動發而相承專制遂行萬物以興故謂之
長男水老於辰金生於己一氣存之終而復起故巽為
長女震發於風陰德有紀火中賜鳴母道將始故離為
中女又在西北健戰將升季陰幼昧衰而不勝故兌為
少女倉中拔留肇幽為陽在中未達含而未章故坎為
中男周流接合萬物既終造微更始明而未融故艮為

少男乾圓坤方女柔男剛健柔時推而禍福是將循化
知生從變見亡故吉凶成敗不可亂也大過何也棟桡
莫輔大者過也先王之馭世也刑設而不犯罰著而不
施習坎剛中惟以心亨王正其德公守厥職上下不疑
臣主無惑納約自牖非戶何咎車騎中門劔戟在闈雖
寘叢棘凶已三歲上六失道刑決也故高宗伐鬼方柔
道中也三年有賞德乃豐也同人先號思其終也旅上
之美樂其窮也是以失刑者嚴而不檢喪德者高而不

尊故君子正義以守位固法以威民何衢則亨滅耳而
凶也小過何也踰位凌上害正危身小者過也既濟初
六終亂何也水加日上三陰乘陽以力求濟不止必亡
故初吉終亂也未濟上六飲酒無咎何也過而莫改危
而弗間誰咎之也无妄何也無望而至非會合陰陽之
違行也六三無妄之灾或繫之牛行人得之邑人灾何
也有國而不收其民有衆而不修其器行人得之不亦
灾乎九五之疾勿藥何也非常之厚離以為同无妄之

疾灾以除凶天時成敗何疾之功勿藥有喜不成何試也龍者何也陽健之類盛德尊貴之喻也配天之厚盛德莫高之謂尊貴大人受命處中當陽德之至也亢龍有悔何也繼守承貴有因而德不充者也欲大而不顧其小甘侈而不思其匱居正上位而無卑有貴勞而無據喪志危身是以悔也先王何也大人之功也故建萬國親諸侯樹其義也作樂薦上帝正其命也省方觀民施其令也明罰勅法督其政也閉關不行靜亂民也茂

時育德應顯其福也享帝立廟昭其祿也稱聖王所造
非承平之謂也后者何也成君定位據業修制保教守
法畜履治安者也故自然成功濟用已至大通后成天
地之道以左右民也成化理決施令誥方因統紹衰中
處將正之務非應初受命之事也上者何也日月相易
盛衰相及致飾則利之未捷受故王后不稱君子不錯
上以厚下道自然也君子者何也佐聖扶命翼教明法
觀時而行有道而臣人者也因正德以理其義察危廢

以守其身故經綸以正盈果行以遂義飲食以須時辯
義以作事皆所以章先王之建國輔聖人之神志也見
險慮難思患預防別物居方慎初敬始皆人臣之行非
大君之道也大人者何也龍德潛達貴賤通明有位無
稱大以行之故大過滅示天下幽明大人發輝重光繼
明照于四方萬物仰生合德天地不為而成故太人虎
變天德興也君子曰易順天地序萬物方圓有正體四
時有常位事業有所麗鳥獸有所萃故萬物莫不一也

陰陽性生性故有剛柔剛柔情生情故有愛惡愛惡生
得失得失生悔宏悔宏著而吉凶見八卦居方以正性
著龜圓通以索情情性交而利害出故立仁義以定性
取著龜以制情仁義有偶而禍福分是故聖人以建天
下之位定尊卑之制序陰陽之適別剛柔之節順之者
存逆之者亡得之者身安失之者身危故犯之以別求
者雖吉必凶知之以守篤者雖窮必通故寂寞者德之
主恣睢者賊之原進往者反之初終盡者始之根也是

以未至不可坼也已用不可越也紂有天下之號而比于匹夫之類周處小侯之細而享于西山之賓外內之德已施而貴賤之名未分何也天道未完善惡未淳也是以明夫天之道者不欲審乎人之德者不憂在上而不凌乎下處卑而不犯乎貴故道不可逆德不可拂也是以聖人獨立無悶大羣不益釋之而道存用之而不可既由此觀之易以通矣

達莊論

伊單闕之辰執徐之歲萬物權輿之時季秋遙夜之月
先生徘徊翹翔迎風而遊往遵乎赤水之上來登乎隱
全之丘臨乎曲轍之道顧乎決漭之州恍然而止忽然
而休不識曩之所以行今之所以留悵然而無樂愀然
而歸白素焉平晝間居隱几而彈琴於是縉紳好事之
徒相與聞之共議撰辭合句啓所常疑乃闡鑒整飭嚼
齒先引推年躡踵相隨俱進奕奕然步脣脣然視投跡
蹈階趨而翔至差肩而坐恭袖而檢猶豫相臨莫肯先

占有一人是其中雄桀也乃怒目擊勢而大言曰吾生
乎唐虞之後長乎文武之裔遊乎成康之隆盛乎今者
之世誦乎六經之教習乎吾儒之迹被襖衣冠飛翩垂
曲裾揚雙觴有日矣而未聞乎至道之要有以異之於
斯乎且大人稱之細人承之願聞至教以發其疑先生
曰何哉子之所疑者客曰天道貴生地道貴貞聖人修
之以建其名吉凶有分是非有經務利高勢惡死重生
故天下安而大功成也今莊周乃齊禍福而一死生以

天地為一物以萬類為一指無乃激惑以失真而自以為誠是也於是先生乃撫琴容與慨然而歎俛而微笑仰而流盼噓喻精神言其所見曰昔人有欲觀於閬峰之上者資端冕服驛驅至乎崑崙之下沒而不反端冕者常服之飾驛驅者凡乘之耳非所以矯騰增城之上遊玄圃之中也且燭龍之光不照一堂之上鐘山之口不談曲室之內今吾將墮崔巍之高杜衍謾之流言子之所由幾其寤而獲及乎天地生於自然萬物生於天

地自然者無外故天地名焉天地者有內故萬物生焉當其無外誰謂異乎當其有內誰謂殊乎地流其燥天抗其溼月東出日西入隨以相從解而後合升謂之陽降謂之陰在地謂之理在天謂之文蒸謂之雨散謂之風炎謂之火凝謂之冰形謂之石象謂之星朔謂之朝晦謂之冥通謂之川回謂之淵平謂之土積謂之山男女同位山澤通氣雷風不相射水火不相薄天地合其德日月順其光自然一體則萬物經其常入謂之幽出

謂之章一氣盛衰變化而不傷是以重陰雷電非異出
也天地日月非殊物也故曰自其異者視之則肝膽楚
越也自其同者視之則萬物一體也人生天地之中體
自然之形身者陰陽之精氣也性者五行之正性也情
者遊魂之變欲也神者天地之所以馭者也以生言之
則物無不壽推之以死則物無不夭自小視之則萬物
莫不小由大觀之則萬物莫不大殤子為壽彭祖為夭
秋毫為大泰山為小故以死生為一貫是非為一條也

別而言之則鬚眉異名合而說之則體之一毛也彼六經之言分處之教也莊周之云致意之辭也大而臨之則至極無外小而理之則物有其制夫守什五之數審左右之名一曲之說也循自然性天地者寥廓之談也凡耳目之官名分之施處官不易司舉奉其身非以絕手足裂肢體也然後世之好異者不顧其本各言我而已矣何待於彼殘生害性還為讎敵斷割肢體不以為痛目視色而不顧耳之所聞耳所聽而不待心之所思

心奔欲而不適性之所安故疾疢萌則生意盡禍亂作
則萬物殘矣至人者恬於生而靜於死恬則情不惑
死靜則神不離故能與陰陽化而不易從天地變而不
移生究其壽死循其宜心氣平治消息不虧是以廣成
子處空崗之山以入無窮之門軒轅登崑崙之阜而遺
玄珠之根此則潛身者易以為活而離本者難以永存
也馮夷不遇海若則不以為小雲將不失於鴻濛則
無以知其少由斯言之自是者不章自建者不立守其

有者有據持其無者無執月弦則滿日朝則襲咸池不留陽谷之上而懸車之後將入也故求得者喪爭明者失無欲者自足空虛者受實夫山靜而谷深者自然之道也得之道而正者君子之實也是以作智造巧者害於物明著是非者危其身修飾以顯潔者惑於生畏死而榮生者失其真故自然之理不得作天地不泰而日月爭隨朝夕失期而晝夜無分競逐趨利舛倚橫馳父子不合君臣乖離故復言以求信者梁下之誠也克己

以為人者郭外之仁也竊其雉經者亡家之子也割腹
割肌者亂國之臣也曜菁華被沆瀣者昏世之士也履
霜露蒙塵埃者貪冒之民也潔己以尤世修身以明洿
者誹謗之屬也繁稱是非背質追文者迷罔之倫也成
非媚悅以容求孚故被珠玉以赴水火者桀紂之終也
含菽采薇交餓而死顏夷之窮也是以名利之塗開則
忠信之誠薄是非之辭著則醇厚之情燦也故至道之
極混一不分同為一體得失無聞伏羲氏結繩神農教

耕逆之者死順之者生又安知貪洿之為罰而貞白之為名乎使至德之要無外而已大均淳固不貳其紀清淨寂寥空豁以俟善惡莫之分是非無所爭故萬物反其所而得其情也儒墨之後堅白竝起吉凶連物得失在心結徒聚黨辯說相侵昔大齊之雄三晉之士嘗相與瞋目張膽分別此矣咸以為百年之生難致而日月之蹉無常皆盛僕馬修衣裳美珠玉飾帷牆出媚君上入欺父兄矯厲才智競逐縱橫家以慧子殘國以才臣

亡故不終其天年而大自割繫其於世俗也是以山中之木本大而莫相吹萬數竅相和忽焉自己夫鷹之不存無其質而濁其文死生無變而龜之見寶知吉凶也故至人清其質而濁其文死生無變而未始有云夫別言者壞道之談也折辯者毀德之端也氣分者一身之疾也二心者萬物之患也故夫裝束馮軾者行以離支慮在成敗者坐而求敵踰阻攻險者趙氏之人也舉山填海者燕楚之人也莊周見其若此故述道德之妙敘

無為之本寓言以廣之假物以延之聊以娛無為之心
而逍遙於一世豈將以希咸陽之門而與稷下爭辯也
哉夫善接人者導焉而已無所逆之故公孟季子衣繡
而見墨子弗攻中山子牟心在魏闕而詹子不距因其
所以來用其所以至循而泰之使自居之發而開之使
自舒之且莊周之書何足道哉猶未聞夫太始之論玄
古之微言乎直能不害於物而形以生物無所毀而神
以清形神在我而道德成忠信不離而上下平茲客今

談而同古齊說而意殊是心能守其本而口發不相須也於是二三子者風搖波蕩相視脣脈亂次而退蹠趺失迹隨而望之耳後頗亦以是知其無寔喪氣而慙愧於衰僻也

通老論

聖人明於天人之理達於自然之分通於治化之體審於大慎之訓故君臣垂拱完太素之樸百姓熙怡保性命之和

道者法自然而為化侯王能守之萬物將自化易謂之
太極春秋謂之元老子謂之道

三皇依道五帝仗德三王施仁五霸行義強國任智益
優劣之異薄厚之降也

傳

大人先生傳

大人先生蓋老人也不知姓字陳天地之始言神農黃
帝之事昭然也莫知其生年之數嘗居蘇門之山故世

或謂之間養性延壽與自然齊光其視堯舜之所事若
手中耳以萬里為一步以千歲為一朝行不赴而居不
處求乎大道而無所寓先生以應變順和天地為家運
去勢隕魄然獨存自以為能足與造化推移故默探道
德不與世同自好者非之無識者怪之不知其變化神
微也而先生不以世之非怪而易其務也先生以為中
區之在天下曾不若蠅蚊之著帷故終不以為事而極
意乎異方奇域遊鑒觀樂非世所見徘徊無所終極遺

其書於蘇門之山而去天下莫知其所如往也或遺大
人先生書曰天下之貴莫貴於君子服有常色貌有常
則言有常度行有常式立則磬折拱若抱鼓動靜有節
趨步商羽進退周旋咸有規矩心若懷冰戰戰慄慄束
身修行日慎一日擇地而行唯恐遺失誦周孔之遺訓
歎唐虞之道德唯法是修唯禮是克手執珪璧足履繩
墨行欲為目前檢言欲為無窮則少稱鄉間長聞邦國
上欲圖三公下不失九州牧故挾金玉垂文組享尊位

取茅土揚聲名於後世齊功德於往古奉事君上牧養
百姓退營私家育長妻子卜吉宅慮乃億祉遠禍近福
永堅固已此誠士君子之高致古今不易之美行也今
先生乃被髮而居巨海之中與若君子者遠吾恐世之
歎先生而非之也行為世所笑身無由自達則可謂恥
辱矣身處困苦之地而行為世俗之所笑吾為先生不
取也於是大人先生乃遁然而歎假雲霓而應之曰若
之云尚何通哉夫大人者乃與造物同體天地並生逍

遙浮世與道俱成變化散聚不常其形天地制域於內而浮明開達於外天地之永固非世俗之所及也吾將為汝言之往者天嘗在下地嘗在上反覆顛倒未之安固焉得不失度式而常之天因地動山陷川起雲散震壞六合失理汝又焉得擇地而行趨步商羽往者羣氣爭存萬物死慮支體不從身為泥土根拔枝殊咸失其所汝又焉得束身修行磬折抱鼓李牧功而身死伯宗忠而世絕進求利以喪身營爵賞而家滅汝又焉得挾

金玉萬億祇奉君上而全妻子乎且汝獨不見夫虱之處於裨中逃乎深縫匿乎壞絮自以為吉宅也行不敢離縫際動不敢出裨禍自以為得繩墨也饑則噉人自以為無窮食也然炎丘火流焦邑滅都羣虱死於裨中而不能出汝君子之處區內亦何異夫虱之處裨中乎悲夫而乃自以為遠禍近福堅無窮已亦觀夫陽鳥遊於塵外而鶡鶡戲於蓬艾小大固不相及汝又何以為若君子聞於予乎且近者夏喪於商周播之劉耿薄為

墟豐鎬成丘至人來一顧而世代相酬厥居未定他人
已有汝之茅土將誰與久是以主人不處而居不脩而
治日月為正陰陽為期豈差情乎世繫累於一時來東
雲駕西風與陰守雌據陽為雄志得欲從物莫之窮又
何不能自達而畏夫世笑哉昔者天地開闢萬物竝生
大者恬其性細者靜其形陰藏其氣陽發其精害無所
避利無所爭放之不失收之不盈亡不為天存不為壽
福無所得禍無所咎各從其命以度相守明者不以智

勝閭者不以愚敗弱者不以迫畏强者不以力盡蓋無
君而庶物定無臣而萬事理保身修性不違其紀惟茲
若然故能長久今汝造音以亂聲作色以詭形外易其
貌內隱其情懷欲以求多詐偽以要名君立而虐興臣
設而賊生坐制禮法束縛下民欺愚誑拙藏智自神強
者睽眠而凌暴弱者憔悴而事人假廉以成貪內險而
外仁罪至不悔過幸遇則自矜馳此以奏除故循滯而
不振夫無貴則賤者不怨無富則貧者不爭各足於身

而無所求也恩澤無所歸則死敗無所仇奇聲不作則耳不易聽淫色不顯則目不改視耳目不相易改則無以亂其神矣此先世之所至止也今汝尊賢以相高競能以相尚爭勢以相君寵貴以相加驅天下以趣之此所以上下相殘也竭天地萬物之至以奉聲色無窮之欲此非所以養百姓也於是懼民之知其然故重賞以喜之嚴刑以威之財匱而賞不供刑盡而罰不行乃始有亡國戮君潰敗之禍此非汝君子之為乎汝君子之

禮法誠天下殘賊亂危死亡之術耳而乃目以為美行
不易之道不亦過乎今吾乃飄颻於天地之外與造化
為友朝食湯谷夕飲西海將變化遷易與道周始此之
於萬物豈不厚哉故不通於自然者不足以言道闇於
昭昭者不足與達明子之謂也先生既申若言天下之
喜奇者異之忼愾者高之其不知其體不見其情猜耳
其道虛偽之名莫識其真弗達其情雖異而高之與嚮
之非怪者蔑如也至人者不知乃貴不見乃神神貴之

道存乎內而萬物運於外矣故天下終而不知其用也
迫乎有宗扶搖之野有隱士焉見之而喜自以為均志
同行也曰善哉吾得之見而舒憤也上古質樸淳厚之
道已廢而末枝遺華竝興豺虎貪虐羣物無辜以害為
利殞性亡軀吾不忍見也故去而處茲人不可與為傳
不若與木石為隣安期逃乎蓬山角李潛乎丹水鮑焦
立以枯槁萊維去而迫死亦由茲夫吾將抗志顯高遂
終於斯禽生而獸死埋形而遺骨不復反余之生乎夫

志均者相求好合者齊顏與夫子同之於是先生乃舒
虹霓以蕃塵傾雪蓋以蔽明倚瑤廊而徘徊總衆轡而
安行顧而謂之曰泰初真人唯大之根專氣一志萬物
以存退不見後進不覩先發西北而造制啓東南以為
門微道而以德久娛樂跨天地而處尊夫然成吾體也
是以不避物而處所覩則寧不以物為累所遁則成彷
徉足以舒其意浮騰足以逞其情故至人無宅天地為
客至人無主天地為所至人無事天地為故無是非之

別無善惡之異故天下被其澤而萬物所以燭也若夫
惡彼而好我自是而非人忿激以爭求貴志而賤身伊
禽生而獸死尚何顯而獲榮悲夫子之用心也薄安利
以忘生要求名以喪體誠與彼其無詭何枯槁而適死
子之所好何足言哉吾將去子矣乃揚眉而蕩目振袖
而撫裳今緩轡而縱策遂風起而雲翔彼人者瞻之而
垂泣自痛其志衣草木之皮伏于巖石之下懼不終夕
而死先生過神宮而息漱吳泉而行迴乎道而遊覽焉

見薪於阜者歎曰汝將焉以是終乎哉薪者曰是終我
乎不以是終我乎且聖人無懷何其哀夫盛衰變化常
不于茲藏器於身伏以俟時孫刖足以擒龐睢折脇而
乃休百里困而相羸牙既老而弼周既顛倒而更來兮
固先窮而後收秦破六國并兼其地夷滅諸侯南面稱
帝姱盛色崇靡麗鑿南山以為闕表東海以為門門萬
室而不絕圖無窮而永存美宮室而盛帷幕擊鐘鼓而
揚其章廣苑囿而深池沼輿渭北而建咸陽麗木曾未

及成林而荆棘已藂乎阿房時代存而迭處故先得而後亡山東之徒虜遂起而王天下由此視之窮達詎可知耶且聖人以道德為心不以富貴為志以無為用不以人物為事尊顯不加重貧賤不自輕失不自以為辱得不自以為榮木根挺而枝遠葉繁茂而華零無窮之死猶一朝之生身之多少又何足營因歎而歌曰日沒不周方月出丹淵中陽精蔽不見陰光代為雄亭亭在須臾厭厭將復東離合雲霧兮往來如飄風富貴俛仰

間貧賤何必終留侯起亡虜威武赫夷荒召平封東陵
一旦為布衣枝葉托根柢死生同盛衰得志從命升失
勢與時墮寒暑代征邁變化更相推禍福無常主何憂
身無歸推茲由斯閼負薪又何哀先生聞之笑曰雖不
及大庶免小矣乃歌曰天地解兮六合開星辰震震兮日
月墮我騰而上將何懷衣弗襲而服美佩弗飾而自章
上下徘徊兮誰識吾常遂去而遐浮肆雲輿興氣蓋倘
佯回翔兮漭瀼之外建長星以為旗兮擊雷霆之礎礪

開不周而出車兮步九野之夷泰坐中州而一顧兮望
崇山而迴邁端余節而飛旃兮縱心慮乎荒裔釋前者
而弗脩兮馳蒙間而遠道棄世務之衆為兮何細事之
足賴虛形體而輕舉兮精微妙而神豐命夷羿使寬日
兮名忻來使緩風攀扶桑之長枝兮登扶搖之隆崇躍
潛飄之冥昧兮洗光曜之昭明遺衣裳而弗服兮服雲
氣而遂行朝造駕乎湯谷兮夕息馬乎長泉時奄茲而
易氣兮輝若華以照冥左朱陽以舉麾兮右玄陰以建

旗變客飾而改度遂騰竊以修征陰陽更而代邁四時
奔而相遁惟仙化之倏忽兮心不樂乎久留驚風奮而
遺樂兮雖雲起而忘憂忽電消而神遁兮歷寥廓而遐
遊佩日月以舒光兮登徜徉而上浮厤前進于彼遁兮
將步足乎虛州掃紫宮而陳席兮坐帝室而忽會酬萃
衆音而奏樂兮聲驚渺而悠悠五帝舞而再屬兮六神
歌而伐周樂啾啾肅肅洞心達神超遙茫茫心往而
忘反慮大而志矜卑大人微而弗復兮揚雲氣而上陳

名大幽之玉女兮接上王之美人體雲氣之迺暢兮服
太清之淑真合歡情而微授兮先艷溢其若神華姿燧
以俱發兮采色煥其竝振傾玄髦而垂鬢兮曜紅顏而
自新時曖昧而將逝兮風飄颻而振衣雲氣解而霧離
兮靄奔散而永歸心惝惘而遙思兮眇迴目而弗睇揚
清風以為旗兮翼旋軫而反衍騰炎陽而出疆兮命祝
融而使遣驅玄冥以攝堅兮蓐收秉而先戈勾芒奉轂
淳驚朝霞寥廓茫茫而靡都兮邈無儔而獨立倚瑤窗

而一顧兮哀下土之憔悴分是非以為行兮又何足與
比類霓旌飄兮雲旂靄樂遊兮出天外大人先生被髮
飛鬢衣方離之衣繞紱陽之帶含奇芝嚼甘華喻浮霧
食霄霞興朝雲颺春風奮乎太極之東遊乎崑崙之西
遺轡墮策流盼乎唐虞之都惘然而思悵爾若忘慨然
而歎曰嗚呼時不若歲歲不若天天不若道道不若神
神者自然之根也彼勾勾者自以為貴夫世矣而惡知
夫世之賤乎茲哉故與世爭貴貴不足尊與世爭富富

不足先必超世而絕羣遺俗而獨往登乎太始之前覽
乎湯漠之初慮周流於無外志浩蕩而自舒飄颻於四
運翶翔乎八隅欲從肆而彷彿混養而靡拘細行不
足以為毀聖賢不足以為譽變化移易與神明扶廓無
外以為宅周宇宙以為廬強入維而處安據制物以永
居夫如是則可謂富貴矣是故不與堯舜齊德不與湯
武竝功王許不足以為匹陽丘豈能與比縱天地且不
能越其壽廣成子曾何足與竝容激八風以揚聲躡元

吉之高蹤被九天以開除兮來雲氣以馭飛龍專上下
以制統兮殊古今而靡同夫世之名利胡足以累之哉
故提齊而跋楚挈趙而蹈秦不滿一朝而天下無人東
西南北莫之與隣悲夫子之修飾以余觀之將焉存乎
於茲先生乃去之紛決莽軌沕洋洋汎衍溢歷度重淵跨
青天顧而逍遙焉則有逍遙以永年無存忽合散而上
臻霍分離蕩漾洋洋飈涌雲浮達於搖光直馳騖乎
太初之中而休息乎無為之宮太初何如無後無先莫

究其極誰識其根邈渺綿綿乃反復乎大道之所存莫暢其究誰曉其根辟九靈而求索曾何足以自隆登其萬天而通觀浴大始之和風漂逍遙以遠逍遙大路之無窮遺太乙而弗使陵天地而徑行超濛鴻而遠跡左蕩莽而無涯右幽悠而無方上遙聽而無聲下修視而無章施無有而宅神永太清乎教翔雀巍高山勃玄雲朔風橫厲白雪紛積水若陵寒傷人陰陽失位日月隕地坼石裂林木摧火冷陽凝寒傷懷陽和微弱隆陰竭

海凍不流綿絮折呼喻不通寒傷烈氣并代動變如神
寒倡熱隨害傷人熙與真人懷太清精神專一用意平
寒暑勿傷莫不驚憂患靡由素氣寧浮霧凌天恣所經
往來微妙路無傾好樂非世又何爭人且皆死我獨生
真人遊駕八龍曜日月載雲旗徘徊逍遙所之真人遊
太階夷原辟天門開雨濛濛風颺颺登黃山出栖遲江
河清洛無埃雲氣消真人來真人來唯樂哉時世易好
樂隤真人去與天回反未央延年壽獨教世望我何時

反趙漫漫路日遠先生從此去矣天下莫知其所終極
蓋陵天地而與浮明遨遊無始終自然之至真也鶴鵠
不踰濟貉不渡汶世之常人亦由此矣曾不通區域又
況四海之表天地之外哉若先生者以天地為卵耳如
小物細人欲論其長短議其是非豈不哀也哉

贊

老子贊

陰陽不測變化無倫飄颻太素歸虛反真

誄

孔子誄

養徒三千升堂七十潛神演思因使作書考混元於無形本造化於太初

帖

搏赤猿帖

僕不想歟爾夢搏赤猿其力甚于貔虎良久反覆余乃觀天背地覩穹亦當不爽但僕之不達安得不憂吉乎

報我凶乎詳告三月阮籍白繇君

文

弔某公文

沈漸荼酷仁義同違如何不弔玉碎冰摧

詩

詩品云阮籍詩其源出於小雅無雕蟲之功而詠懷之作可以陶性靈發幽思言在耳目之內情寄八荒之表洋洋乎會於風雅使人忘其鄙近自致遠大頗多感慨之詞厥旨淵放歸趣難求顏延之注解怯言其志詩譜云天識清虛禮法疎短竹林詩評云阮籍之作如剡溪雪夜孤

楫沿流乘興而來興盡而已嚴滄浪云黃初之後惟阮籍詠懷之作極為高古有建安風骨藝苑危言云阮公詠懷遠近之間遇境即際興窮即止坐不著論宗佳耳人乃謂陳子昂勝之何必子昂寧無感興乎哉

詠懷詩三首

天地網緼元精代序清陽曜靈和風容與明月映天甘露被宇翁鬱高松猗那長楚草蟲哀鳴鶴鶩振羽感時興思企首延佇於赫帝朝伊衡作輔才非允文器非經武適彼沅湘託分漁父優哉游哉爰居爰處

其二

月明星稀天高氣寒桂旗翠旌珮玉鳴鸞濯纓醴泉被
服蕙蘭思從二女適彼湘沅靈幽聽微誰觀玉顏灼灼
春華綠葉含丹日月逝矣惜爾華繁

其三

清風肅肅修夜漫漫嘯歌傷懷獨寐寤言臨觴拊膺對
食忘餐世無萱草令我哀歎鳴鳥求友谷風刺愆重華
登庸帝命凱元鮑子傾蓋仲父佐桓回濱嗟虞敢不希

顏志存明規匪慕彈冠我心伊何其芳若蘭

詠懷八十二首

顏廷年云阮公身事亂朝常恐遇禍因茲詠懷雖志在譏刺而

文多隱避百代之下難以情惻故粗明大意畧其幽旨也詩紀云阮集傳之既久頗存謠
闋校錄者往往肆為補綴作者之旨清亂甚焉今以諸本參校其義稍優

夜中不能寐起坐彈鳴琴薄帷鑒明月清風吹我衿孤鴻號外野翔鳥鳴北林徘徊將何見憂思獨傷心

其二

二妃遊江濱逍遙順風翔交甫懷環珮婉孌有芬芳猗

靡情歡愛千載不相忘傾城迷下蔡容好結中腸感激
生憂思萱草樹蘭房膏沐為誰施其雨怨朝陽如何金
石交一旦更離傷

其三

嘉樹下成蹊東園桃與李秋風吹飛藿零落從此始繁
華有憔悴堂上生荆杞驅馬舍之去去上西山趾一身
不自保何況戀妻子凝霜被野草歲暮亦云已

其四

天馬出西北由來從東道春秋非有託富貴焉常保清
露被臯蘭凝霜霑野草朝為媚少年夕暮成醜老自非
王子晉誰能常美好

媚五臣作美

其五

平生少年時輕薄好絃歌西遊咸陽中趙李相經過娛
樂未終極白日忽蹉跎驅馬復來歸反顧望三河黃金
百鎰盡資用常苦多北臨太行道失路將如何

丹鉛餘錄云阮

籍詠懷詩西遊咸陽市趙李相經過顏延年以為趙飛
燕李夫人劉會孟謂安知非實有此人不必求其誰何

也不詳詩意咸陽趙李謂游俠近侍之儔漢谷永傳小臣趙李從微賤貴寵成帝常與微行籍用趙李字正出此若如顏延年之說趙飛燕李夫人豈可言經過如劉會孟言當時實有此人唐王維詩亦有日夜經過趙李延年之博學會孟之精鑒亦不免失之況下此者耶詩家豈唐時亦實有此人乎乃知讀書不詳考深思雖如話補遺云按漢書乃趙李李欵

其六

昔聞東陵瓜近在青門外連畛距阡陌子母相鈎帶五色曜朝日嘉賓四面會膏火自煎熬多財為患害布衣可終身寵祿豈足賴

其七

炎暑惟茲夏三旬
將欲移芳樹垂綠葉
青雲自逶迤四時更代謝
日月遞參差徘徊空堂上
忉怛莫我知願覩卒歡好
不見悲別離參差一作差馳

其八

灼灼西隕日餘光照我衣
迴風吹四壁寒鳥相因依
周尚銜羽蛩蛩亦念飢
如何當路子磬折忘所歸
豈為夸譽名憔悴使心悲
寧與燕雀翔不隨黃鸝飛
黃鸝遊

四海中路將安歸

譽一作與

其九

步出上東門北望首陽岑下有采薇士上有嘉樹林良
辰在何許凝霜靄衣襟寒風振山岡玄雲起重陰鳴鴈
飛南征鶗鴂發哀音素質游商聲悽愴傷我心

其十

北里多奇舞濮上有微音輕薄閒遊子俯仰乍浮沈捷
徑從狹路僵俛趨荒淫焉見王子喬乘雲翔鄧林獨有

延年術可以慰我心

以五臣作用

其十一

湛湛長江水上有楓樹林臯蘭被徑路青驪逝駿駿遠
望令人悲春氣感我心三楚多秀士朝雲進荒淫朱華
振芬芳高蔡相追尋一為黃雀哀淚下誰能禁

其十二

昔日繁華子安陵與龍陽夭夭桃李花灼灼有輝光悅
憚若九春磬折似秋霜流盼發姿媚言笑吐芬芳擣手

等歡愛宿昔同衣裳願為雙飛鳥比翼共翹翔丹青著
明誓永世不相忘

其十三

登高臨四野北望青山阿松柏翳岡岑飛鳥鳴相遇感
慨懷辛酸怨毒常苦多李公悲東門蘇子狹三河求仁
自得仁豈復歎咨嗟

其十四

開秋兆涼氣蟋蟀鳴牀帷感物懷殷憂悄悄令心悲多

言焉所告繁辭將訴誰微風吹羅袂明月耀清暉晨雞鳴高樹命駕起旋歸

其十五

昔年十四五志尚好詩書被褐懷珠玉顏閔相與期開軒臨四野登高望所思丘墓蔽山岡萬代同一時千秋萬歲後榮名安所之乃悟羨門子噭噭令自嗤

其十六

徘徊蓬池上還顧望大梁綠水揚洪波曠野莽茫茫走

獸交橫馳飛鳥相隨翔是時鶴火中日月正相望朔風厲嚴寒陰氣下微霜羈旅無儔匹俛仰懷哀傷小人計其功君子道其常豈惜終憔悴詠言著斯章

其十七

獨坐空堂上誰可與歡者出門臨永路不見行車馬登高望九州悠悠分曠野孤鳥西北飛離獸東南下日暮思親友晤言用自寫

其十八

懸車在西南羲和將欲傾流光耀四海忽忽至夕冥朝

為咸池暉濛汜受其榮豈知窮達士一死不再生視彼
桃李花誰能久熒熒君子在何許曠世未合并瞻仰景
山松可以慰吾情知集作放曠
世一作嘆息

其十九

西方有佳人皎若白日光被服纖羅衣左右珮雙璜修
容耀姿美順風振微芳登高眺所思舉袂當朝陽寄顏
雲霄間揮袖凌虛翔飄颻恍惚中流眄顧我傍悅懌未

交接晤言用感傷

當集作向

其二十

楊朱泣歧路墨子悲染絲楫讓長離別飄颻難與期豈
徒燕婉情存亡誠有之蕭索人所悲禍釁不可辭趙女
媚中山謙柔愈見欺嗟嗟塗上士何用自保持

其二十一

於心懷寸陰羲陽將欲冥揮袂撫長劍仰觀浮雲征雲
間有元鶴抗志揚哀聲一飛沖青天曠世不再鳴豈與

鶡鶠遊連翩戲中庭

京師曹氏家藏阮步兵詩一卷唐人所書與世所傳多異其一篇云

放心

懷寸陰義和

將欲冥揮袂撫長劍

仰觀浮雲行雲間有立鵠抗首揚哀聲一飛冲青天疆世不再鳴安與

鶡

鶠徒翩翩

戲中庭孔

宗翰亦有本與此多同

其二十二

夏后棄靈輿夸父為鄧林存亡從變化日月有浮沈鳳凰鳴參差伶倫發其音王子好簫管世世相追尋誰言不可見青鳥明我心

其二十三

東南有射山汾水出其陽六龍服氣輿雲蓋切天綱仙者四五人逍遙晏蘭房寢息一純和呼翕成露霜沐浴丹淵中焰燿日月光豈安通靈臺游養去高翔切一作覆通集

作邇

其二十四

殷憂令志結忧惕常若驚逍遙未終晏朱華忽西傾蟋蟀在戶牖蟪蛄號中庭心腸未相好誰云亮我情願為雲間鳥千里一哀鳴三芝延瀛洲遠遊可長生

其二十五

拔劍臨白刃安能相中傷但畏工言子稱我三江旁飛
泉流玉山懸車棲扶桑日月徑千里素風發微霜勢路
有窮達咨嗟安可長勢外編作世

其二十六

朝登洪坡顛日夕望西山荆棘被原野羣鳥飛翩翩鸞
鷺時棲宿性命有自然建木誰能近射千復蟬娟不見
林中葛延蔓相勾連

時集

其二十七

周鄭天下交街術當三河妖冶間都子煥耀何芬葩
玄髮發朱顏睇眄有光華傾城思一顧遺視來相誇願為
三春遊朝陽忽蹉跎盛衰在須臾離別將如何

發一作照誇初

學作
週

其二十八

若花燿西海扶桑翳瀛洲日月經天塗明暗不相讐窮
達自有常得失又何求豈路上童攜手共遨遊陰陽

有變化誰云沈不浮朱鼈躍飛泉夜飛過吳洲俛仰運
天地再撫四海流繫累多利場駕駿同一軒豈若遺耳
目升遐去殷憂

花一作木西一
四讐集作侔

其二十九

昔余遊大梁登于黃華顛共工宅玄冥高臺造青天幽
荒邈悠悠悽愴懷所憐所憐者誰子明察自照妍應龍
沈冀州妖女不得眠肆侈陵世俗豈云永厥年

自照妍一作應

自然侈一作伎○詩話補遺云阮籍詩昔余遊大梁登
于黃華顛應龍沈冀州妖女不得眠按戰國策趙武靈

西至河登黃華之上夢處女鼓琴歌詩因納吳廣女娃
嬴孟姚其先七世而兆于簡子之夢及入宮而奪嫡亂
國豈非妖女乎張平子應問曰女魃北而應龍翔合而
觀之可見其微意蓋當是時魏明帝郭后毛后妬寵相
殺正類武靈王事故隱語怪說亦春秋定哀多微辭意也

其三十

驅車出門去意欲遠征行征行安所如背弃夸與名夸
名不在已但願適中情單帷蔽皎日高榭隔微聲謾邪
使交疏浮雲令晝冥嬿婉同衣裳一顧傾人城從容在
一時繁華不再榮晨朝奄復暮不見所歡形黃鳥東南

飛寄言謝友生

其三十一

駕言發魏都南向望吹臺簫管有遺音梁王安在哉戰士食糟糠賢者處蒿萊歌舞曲未終秦兵已復來夾林非吾有朱宮生塵埃軍敗華陽下身竟為土灰

世說新桓語

玄西下入石頭外白司馬梁王奔叛時事形已濟在平乘上笳鼓並作直高詠云簫管有遺音梁王安在哉文昌襍錄云東京記大清寺繁臺梁孝王按歌吹之臺阮公詩云駕言發魏都南向望吹臺簫管有餘音梁王安在哉後有繁氏居其側里人呼為繁臺

其三十二

朝陽不再盛白日忽西幽去此若俯仰如何似九秋人生若塵露天道邈悠悠齊景升丘山涕泗紛交流孔醒臨長川惜逝忽若浮去者余不及來者吾不留願登太華山上與松子遊漁父知世患乘流泛輕舟

其三十三

一日復一夕一夕復一朝顏色改平常精神自損消胸中懷湯火變化故相招萬事無窮極知謀苦不饒但恐

須臾間魂氣隨風飄終身履薄冰誰知我心焦

極一作理

其三十四

一日復一朝一昏復一晨容色改平常精神自飄淪臨
觴多哀楚思我故時人對酒不能言悽愴懷酸辛願耕
東臯陽誰與守其真愁苦在一時高行傷微身曲直何
所為龍蛇為我隣

其三十五

世務何纊紛人道苦不遑壯年以時逝朝露待太陽願

攬羲和轡白日不移光天階路殊絕雲漢邈無梁濯髮
賜谷濱遠遊崑岳傍登彼列仙岨採此秋蘭芳時路烏
足爭大極可翹翔

其三十六

誰言萬事藉逍遙可終生臨堂翳華樹悠悠念無形彷
徨思親友倏忽復至寘寄言東飛鳥可用慰我情

其三十七

嘉時在今辰零雨灑塵埃臨路望所思日夕復不來人

情有感慨蕩漾焉能排揮涕懷哀傷辛酸誰語哉

其三十八

炎光延萬里洪川蕩湍瀨彎弓掛扶桑長劍倚天外泰山成砥礪黃河為裳帶視彼莊周子榮枯何足賴捐身
弃中野烏鳶作患害豈若雄傑士功名從此大

其三十九

壯士何慷慨志欲威八荒驅車遠行役受命念自忘良弓挾烏號明甲有精光臨難不顧生身死魂飛揚豈為

全軀士效命爭戰場忠為百世榮義使令名彰垂聲謝
後世氣節故有常

其四十

混元生兩儀四象運衡璣曜日布炎精素月垂景暉晷
度有昭回哀哉人命微飄若風塵逝忽若慶雲晞修齡
適余願光寵非已威安期步天路松子與世違焉得凌
霄翼飄颻登雲湄嗟哉尼父志何為居九夷

其四十一

天網彌四野六翮掩不舒隨波紛綸客汎汎若浮鳬生
命無期度朝夕有不虞列仙停修齡養志在沖虛飄飄
雲日間邈與世路殊榮名非已寶聲色焉足娛採藥無
旋返神仙志不符逼此良可惑令我久躊躇

客集作落浮鳬一作

鳬

其四十二

王業須良輔建功俟英雄元凱康哉美多士頌聲隆陰
陽有舛錯日月不常融天時有否泰人事多盈冲園綺

遯南岳伯陽隱西戎保身念道真寵耀焉足崇人誰不
善始尠能尅厥終休哉上世士萬載垂清風

其四十三

鴻鵠相隨飛飛適荒裔雙翮臨長風須臾萬里逝朝
餐琅玕實夕宿丹山際抗身青雲中網羅孰能制豈與
鄉曲士攜手共言誓從藝文定正

其四十四

傳物終始殊修短各異方琅玕生高山芝英耀朱堂燭

焚桃李花成蹊將天傷焉敢希干術三春表微光自非
凌風樹憔悴烏有常烏一作要

其四十五

幽蘭不可珮朱草為誰榮修竹隱山陰射干臨增城葛
藟延幽谷縵縵瓜瓞生樂極消靈神哀深傷人情竟知
憂無益豈若歸太清

其四十六

鶯鳩飛桑榆海鳥運天池豈不識宏大羽翼不相宜招

搖安可翔不若棲樹枝下集蓬艾間上游園圃籬但爾

亦自足用子為追隨

此首藝文類聚所載與今本不同而義意近優觀李善文選注江文

通擬詠懷詩所引與藝文同
亦一証也今從藝文定正

其四十七

生命辰安在憂戚涕沾襟高鳥翔山岡鶯雀樓下林青
雲蔽前庭素琴悽我心崇山有鳴鶴豈可相追尋

其四十八

鳴鳩嬉庭樹焦明遊浮雲焉見孤翔鳥翩翩無匹羣死

生自然理消散何繽紛

漢魏詩集前為一首

其四十九

步遊三衢旁惆悵念所思豈為今朝見恍惚誠有之澤
中生喬松萬世未可期高鳥摩天飛凌雲共遊嬉豈有
孤行士垂涕悲故時

未一作安

其五十

清露為凝霜華草成蒿萊誰云君子賢明達安可能棄
雲招松喬呼喻永矣哉

其五十一

丹心失恩澤重德喪所宜善言焉可長慈惠未易施不見南飛燕羽翼正差池高子怨新詩三閭悼乖離何為混沌氏倏忽體貌墮

其五十二

十日出陽谷弭節馳萬里經天耀四海倏忽潛濛汜誰言焱炎久遊沒何行俟逝者豈長生亦去荆與杞千載猶崇朝一餐聊自己是非得失間焉足相譏理計利知

術窮哀情遽能止

聊自己一作百
金子遽一作克

其五十三

自然有成理生死道無常智巧萬端出大要不易方如
何夸鬼子作色懷驕腸乘軒驅良馬憑几向膏梁被服
纖羅衣深榭設閒房不見日夕華翩翩飛路傍

其五十四

夸談快憤懣情慵發煩心西北登不周東南望鄧林曠
野彌九州崇山抗高岑一餐度萬世千歲再浮沈誰云

玉石同淚下不可禁

情一作情

其五十五

人言願延年延年欲焉之黃鵠呼子安千秋未可期獨

坐山嵒中惻愴懷所思王子一何好猗靡相攜持悅懌

猶今辰計校在一時置此明朝事日夕將見欺

今本作潛見安

能處山巖在一時置此
明朝事日夕將見欺

其五十六

貴賤在天命窮達自有時婉孌佞邪子隨利來相欺孤

思損惠施但為讒夫嗤鶴鵠鳴雲中載飛靡所期焉知
傾側士一旦不可持

其五十七

驚風振四野迴雲蔭堂隅牀帷為誰設几杖為誰扶雖
非明君子豈閭桑與榆世有此聲墮茫茫將焉如翩翩
從風飛悠悠去故居離麾玉山下遺弃毀與譽

其五十八

危冠切浮雲長劌出天外細故何足慮高度跨一世非

子為我御逍遙遊荒裔顧謝西王母吾將從此逝豈與
蓬戶士彈琴誦言誓

其五十九

河上有丈人緯蕭弃明珠甘彼藜藿食樂是蓬蒿廬室
效繢紛子良馬騁龍輿朝生衢路旁夕瘞橫術隅歡笑
不終晏俛仰復歎歔鑒茲二三者憤懣從此舒

其六十

儒者通六藝立志不可干違禮不為動非法不肯言渴

飲清泉流饑食并一簞歲時無以祀衣服常告寒屣履

詠南風緼袍笑華軒信道守詩書義不受一餐烈烈襄

貶辭老氏用長歎

藝一作義
并一作甘

其六十一

少年學擊刺妙伎過曲城英風截雲霓超世發奇聲揮
劍臨沙漠飲馬九野坰旗幟何翩翩但聞金鼓鳴軍旅
令人悲烈烈有哀情念我平常時悔恨從此生

刺集作劍

其六十二

平晝整衣冠思見客與賓賓客者誰子倏忽若飛塵裳
衣佩雲氣言語究靈神須臾相背弃何時見斯人

其六十三

多慮令志散寂寞使心憂翹翔觀陂澤撫劍登輕舟但
願長間暇後歲復來遊陂一作彼

其六十四

朝出上東門遙望首陽基松柏鬱森沈鶴黃相與嬉逍
遙九曲間徘徊欲何之念我平居時鬱然思妖姬

其六十五

王子十五年遊行伊洛濱朱顏茂春華辭慧懷清真焉
見浮丘公舉手謝時人輕蕩易恍惚飄颻弃其身飛飛
鳴且翔揮翼且酸辛

其六十六

塞門不可出海水焉可浮朱明不可見奄昧獨無俟持
瓜思東陵黃雀誠獨羞失勢在須臾帶劍上吾丘悼彼
桑林子涕下自交流假乘汧渭間鞍馬去行遊塞一作寒○丹

鉛餘錄云漢武時事漢武帝崩後忽見形謂陵令薛平
曰我雖失勢猶為汝君奈何令吏卒上吾陵磨劍乎因
不見推陵旁果有方石可以為礪吏卒嘗盜磨刀劍霍
光欲斬之張安世曰神道茫茫不宜為法故阮公詠懷
詩曰失勢在須臾

其六十七

洪生資制度被服止有常尊卑設次序事物齊紀綱容
飾整顏色磬折執圭璋堂上置玄酒室中盛稻梁外厲
貞素談戶內滅芬芳放口從衷出復說道義方委曲周
旋儀姿態愁我腸

其六十八

北臨乾昧谿西行遊少任遙顧望天津駘蕩樂我心綺
靡存込門一遊不再尋儻遇晨風鳥飛駕出南林漭養
瑤光中忽忽肆荒淫休息晏清都超世又誰禁南一作東超世

又誰禁一作
起坐復誰禁

其六十九

人知結交易交友誠獨險路多疑惑明珠未可干彼
求饗太牢我欲并一餐損益生怨毒咄咄復何言

其七十

有悲則有情無悲亦無思苟非嬰網罟何必萬里畿翔
風拂重霄慶雲招所晞灰心寄枯宅曷顧人間姿始得
忘我難焉知嘿自遺無悲亦無思集作無情亦無悲始集作曲

其七十一

木槿榮丘墓煌煌有光色白日頽林中翩翩零路側蟋
蟀吟戶牖蟪蛄鳴荆棘蜉蝣玩三朝采采修羽翼衣裳
為誰施俛仰自收拭生命幾何時慷慨各努力

其七十二

修塗馳軒車長川載輕舟性命豈自然勢路有所繇高
名令志惑重利使心憂親昵懷反側骨肉還相讐更希
毀珠玉可用登遨遊

其七十三

橫術有奇士黃駿服其箱朝起瀛洲野日夕宿明光再
撫四海外羽翼自飛揚去置世上事豈足愁我腸一去
長離絕千歲復相望

其七十四

猗與上世士恬淡志安貧季葉道陵遲馳騁鶩紛垢塵甯
子豈不類揚歌誰肯殉棲棲非我偶徨徨非已倫咄嗟
榮辱事去來味道真道真信可娛清潔存精神巢由抗
高節從此適河濱殉一作詢

其七十五

梁東有芳草一朝再三榮色容豔姿美光華耀傾城豈
為明哲士妖蠱誦媚生輕薄在一時安知百世名路端

便娟子但恐日月傾焉見冥靈木悠悠竟無形

其七十六

秋駕安可學東野窮路旁綸深魚淵潛矰設鳥高翔汎汎乘輕舟演漾靡所望吹噓誰以益江湖相捐忘都治難為顏修容是我常茲年在松喬恍惚誠未央

秋駕作
稅駕者

誤按莊子逸篇尹儒學御三年而無所得夜夢受秋駕明日往朝師師曰今將教子以秋駕註曰秋駕法駕

其七十七

咄嗟行至老傴俛常苦憂臨川羨洪波同始異支流百

年何足言但苦怨與讐讐怨者誰子耳目還相羞聲色
為胡越人情自逼道招彼玄通士去來歸羨遊

其七十八

昔有神仙士乃處射山阿棄雲御飛龍噓喻幾瓊華可
聞不可見慷慨歎咨嗟自傷非疇類愁苦來相加下學
而上達忽忽將如何嚙音機
小食也

其七十九

林中有奇鳥自言是鳳皇清朝飲醴泉日夕棲山岡高

嗚徹九州延頸望八荒適逢商風起羽翼自摧藏一去
崑崙西何時復迴翔但恨處非立愴恨使心傷

其八十

出門望佳人佳人豈在茲三山招松喬萬世誰與期存
亡有長短慷慨將焉知忽忽朝日墮行行將何之不見
入秋草摧折在今時七一作日

其八十一

昔有神仙者羨門及松喬喻習九陽間升近嚙雲霄人

生樂長久百年自言遼白日隕闕谷一夕不再朝豈若
遺世物登明遂飄颻

其八十二

墓前焚焚者木槿耀朱華榮好未終朝連飈隕其葩豈
若西山草琅玕與丹禾垂影臨增城餘光照九阿寧微
少年子日夕難咨嗟

采樵者歌

日沒不周西月出丹淵中陽精蔽不見陰光代為雄亭


亭在須臾厭厭將復隆離合雲霧兮往來如飄風富貴
俯仰間貧賤何必終留侯起亡虜威武赫荒夷邵平封
東陵一旦為布衣枝葉托根柢死生同盛衰得志從命
升失勢與時墮寒暑代征邁變化更相推禍福無常主
何憂身無歸推茲繇斯理負薪又何哀

大人先生歌

天地解兮六合開星辰隕兮日月頽我騰而上將何懷



漢魏六朝百三家集卷三十四



總校官庶吉士臣侍朝
校對官檢討臣王垣修
謄錄監生臣梅德